

Sepades que nos auemos puesto amistad con el rey de Aragon. Et en los pleitos et posturas que son entre nos et el contienese que si los moros, dallen mar o daquen mar, quisieren fazer mal et danno en la tierra del rey de Aragon, que nos que fagamos nuestro poder por enparar et defender los sus logares, asy commo por los nuestros mesmos.

Porque vos mandamos que si los moros dallen mar et daquen mar quisieren fazer mal o danno en las villas et logares del rey de Aragon, que a en esta comarca, que les enbiedes afrontar que lo non fagan, et sy lo non quisieren dexar de fazer que los ayudedes a anparar et defender en manera que non reçiban mal nin danno, et entre tanto que enbiedes dezir a los de la dicha tierra del rey de Aragon que se aperçiban porque sean guardados de danno, commo dicho es.

Et non fagades ende al por ninguna manera, so pena de la nuestra merçed. Et por que entendades que es nuestra voluntad mandamos seellar esta carta con el nuestro seello de la poridat.

Dada en la Fuente del Maestre, quatro dias de junio, era de mill et trezientos et setenta et siete annos. Yo, Matheos Ferrandez, la fiz escreuir por mandado del rey.

CCCLXXVI

1339-VII-27, Guadalhorce. Carta abierta de Alfonso XI al adelantado de Murcia, ordenándole que con las fuerzas murcianas hiciese guerra a los musulmanes. (A.M.M. C.R. 1314-1344, f. 155r).

Don Alfonso, por la graçia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Molina. A uos, Gonçalo Yannes Caluillo, adelantado en el regno de Murçia por don Pedro de Xerica, salut et graçia.

Sepades que somos entrado a tierra de moros et llegamos a Antequera et faze-mosles guerra et danno quanto podemos. Et tenemos por bien que uos fagades eso mismo.

Porque vos mandamos que aperçibades a todos los desa tierra que guarden todos sus ganados et todo lo suyo, et vos e ellos que les fagades a los moros guerra et mal et danno, todo lo mas que podierdes.

Et non fagades ende al, so pena de la nuestra merçed. Et por que entendades que esto es nuestra voluntad mandamos sellar esta carta con nuestro seello de la poridat.

Dada en Guadalforce, XXVII dias de julio, era de mill et trezientos et setenta et siete annos. Yo, Matheos Ferrandez, la fiz escreuir por mandado del rey.

